



## Terenga 3: Hōtaka 12 – Mihi ki ngā Ringawera

Kei ngā ringa hūkere o te waka, teretere mai i runga i ngā roma wai o taiwhenua ki te tumu herenga o Ako. Koinei te pūtahitanga o te hunga e tōngakingaki nei ki te reo o kahika mā.

### Hei Mahi Whakarongo

Ko ngā mihi ki ngā ringawera te kaupapa o te kiriata poto o tēnei rā. Kia hoki tātou ki Te Kāuta ki te whakarongo i ngā kōrero a Te Ākuhata Rangī. Anei ā tātou pātai:

- 1) Nā wai te waiata i tito?
- 2) He aha te take i panonihia ai ngā kupu?
- 3) Ka pēhea ngā whakaaro o te kaitito ki aua panonitanga?

### He Whakamārama

He tikanga whakahirahira te manaaki manuhiri ki te Māori. Koinā te take me whakaaro nui te manuhiri ki ana mihi ki te hunga nāna rātou i manaaki. Hei muri tonu i te kai te wā pai ki te tuku mihi ki ngā ringawera, hei te wā rānei o te poroporoaki mehemea he roa ake i te rā kotahi tā koutou noho i raro i te maru o te hau kāinga.

Anei ētehi kīanga hei tuku mā te manuhiri ki te hau kāinga hei whakamihi i te kaha o te manaaki.

Kua	puta	a	Pito.
Kua	pūnaunau	te whataroa a	Manaia.
Kua	nanea	a	Tia.
Kua	kina	ko	Tia.
Kua	ngata	te	pīkoko.

Arā noa atu ngā momo kīanga ka taea te whakamahi. Māu e rapu mai ngā kupu e ōrite ana te tikanga ki ēnei o runga ake nei. Ki te hiahia koe ki te whakarongo ki te waiata i titoa ai hei mihi ki te ringawera, hono atu ki <http://www.takatu.co.nz>

### Hei Mahi

Kimihia he kupu Māori e rua atu anō e ōrite ana ki ēnei kupu Māori te tikanga:

1. ringawera
2. manaaki
3. puku
4. wharekai
5. kai

### He Whakautu:

1. nihowera, wahawaha
2. whakaute, whakaupa, raupī, tauwhiro
3. tia, whataroa a Manaia
4. te whare o te ora, te whare o Rongo
5. haupa, ō

